

jablo avgorsimajub battaliub pissiaksab ikligijauninga takonârtomut nellonarlungilak.

Niviarsiak tâмна takkonârtok kênakarpok sallô-jomik, nujangillo illakemadlartut nivingavut kaunganut kongesinganullo. Annorâkarpok sujuksimajomik alliktorsimajomik; kellaksimavlune kellarutiksamut uigornekeajomut, taimaimallo sittorkattarpok tuigîngnut tinnaktungnut. Sorrusek naiperkonadlartok kinaugalloarmangât, okausekalungilak, kajûtalle tettejarangata kâfemut katsiorutemit, missatsainarpok, allagaiksartotut sorlo kâfib ônartub tippitsiariktub mamarninganik.

“Taggale,” itok okarsinnarpok, okkungalune sorrutsemut, nippikitôvlune okaromavlune, “sôg aularlungilatit, sorrusek? Omat! akkuneluartomik mânêlerpotit, tagga!”

“Aularniarpunga,” kiovok, tuine kagvalatilugik, annorâne sittorsimajok kongmuartitsomavlugô innigijaksanganut, “kissianele sillalupâdlarpok, anânaralo assinêrkauvok unnuak nâvlugo upkoab pêrutinga neksarlugo. Kâfib tippinga mamagidlarpara, ovanêtilungalo pagvisartauniangilanga polisenut.”

“Uvlârsiutetorlungilatit imakka,” itok okarannerpok, nippimut tâpsomungatsainak illapsugosuktomut.

“Ahaila, nerringilanga sulle,” sorrusek kiovok, “ketteralersiutiksaralo tussugipâdlarniarpara perkâr-nago, taimak kaujimagalloorpunga. Kâkpâdlarlungilatin-ai?”

Itub kioninganik utakkinane sanguvok aularomavlune, ablorkârtinagole unuktunik, nippikitok utterkojijok tussarpâ, tagvainarlo utterpok sâmut.

“Maungartuinarit,” angut okarpok issivsorlune anajagosuklune, “tagga, kâfetorit niakojakulluillo ukua nerrisârkit. Takkuk, maungartuksaungimarikpotit kingorngane, ai? Ittikatit ikomaub sânganut illisârkit. Tujormidlarnak.”